

# Mayat bayi dalam tong sampah

Lagi  
perbuatan  
kejam!

**HULU SELANGOR** – “Mayatnya dibungkus seperti nasi lemak dengan enam helai surat khabar, kemudian diikat dengan empat gelung getah dan diletakkan dalam lima lapis plastik barang.”

Demikian cerita saksi, Mohd Kamal Enoh, 44, yang menemui mayat bayi lelaki di dalam tong sampah bersebelahan sebuah restoran nasi ayam di Kampung Tanjung, Sungai Choh di sini semalam.

Kamal seorang pemandu lori sampah terkejut apabila menemui bayi tersebut yang sempurna sifatnya dan masih bertali pusat di dalam tong sampah ketika melakukan kerja mengangkut sampah kira-kira jam 8 pagi semalam.

“Seperti biasa sebelum saya mengangkut sampah ke dalam lori saya akan mencari tin-tin dan botol-botol yang boleh dijual. Tetapi, ketika sedang memungkah sampah saya terlihat plastik barang yang terikat kemas dengan lapisan yang tebal dan di dalamnya ada bungkusan kertas seperti nasi lemak dan diikat dengan getah.

“Bila saya buka, saya terkejut kerana melihat ada objek seperti jari kaki. Saya tak sedap hati dan terus membuka balutan tersebut dan mendapati ia adalah mayat bayi yang masih bertali pusat,” katanya.


Menurutnya, sebaik menyedari objek yang ditemuinya adalah bayi dia lantas memberitahu rakannya dan seorang pekerja di restoran berkenaan sebelum membuat laporan polis di Balai Polis Serendah.

Ketua Polis Daerah Hulu Selangor, Superintendan Norel Azmi Yahya Affandi ketika dihubungi mengesahkan kejadian itu.

Menurutnya, bayi itu ditemui di dalam timbunan sampah oleh pekerja Majlis Daerah Hulu Selangor (MDHS) sebelum melaporkannya kepada polis.

“Bayi terbabit adalah lelaki yang baru dilahirkan. Cukup sifat serta masih bertali pusat. Tetapi disahkan meninggal dunia,” katanya.

Menurutnya, siasatan masih dijalankan di bawah



● Ketua Balai Polis Serendah, Cif Inspektor Shamsul Bahrin Ahmad (depan) memeriksa mayat bayi dalam bungkusan plastik yang ditemui.

Seksyen 318 Kanun Keseksaan kerana menyembunyikan kelahiran dan menyebabkan kematian bayi.

Katanya, mayat bayi dihantar ke Hospital Kuala Kubu Bharu (HKKB) untuk bedah siasat.

## INFO

**Mayat ditemui di dalam tong sampah bersebelahan sebuah restoran nasi ayam di Kampung Tanjung, Sungai Choh semalam.**



● Shamsul Bahrin (kiri) ketika memeriksa bungkusan bayi berkenaan di dalam timbunan sampah.